



KEMENTERIAN TENAGA DAN SUMBER ASLI

KERATAN SURAT KHABAR

SURAT KHABAR	:	BH		
TARIKH	:	29/9/2021 (RABU)	MUKA SURAT	: 15
JABATAN	:	JPNS		



Jabatan Perhutanan Negeri Selangor dalam operasi penguatkuasaan hutan secara bersepadu merobohkan kawasan petempatan yang dibina dalam Hutan Simpan Kekal Bukit Lagong di Gombak, berhampiran Institut Penyelidikan Perhutanan Malaysia (FRIM), semalam. Keadaan cuaca yang tidak menentu, terutama hujan sejak kebelakangan ini menyebabkan tanah di kawasan berkenaan semakin terhakis akibat aktiviti penerokaan secara haram oleh penduduk tempatan. **Nasional 15** (Foto BERNAMA)

JPNS robohkan 23 binaan haram

14 hektar Hutan Simpan Bukit Lagong dikesan kena ceroboh

Oleh Nor Azizah Mokhtar
bhnews@bh.com.my

Gombak: Jabatan Perhutanan Negeri Selangor (JPNS) merobohkan 23 struktur binaan di bina secara haram di Hutan Simpan Bukit Lagong di sini, menerusi Ops Lagong selama dua hari, bermula semalam.

Antara struktur binaan yang dirobohkan termasuk pondok dan bangsal kayu, rumah kayu, kolam ikan, reban ayam, kandang kambing dan lembu serta sebuah rumah batu dua tingkat.

Kebanyakan struktur binaan itu didirikan di hutan simpan yang diceroboh untuk dijadikan dusun buah-buahan, tanaman kontan, kolam penternakan ikan serta kandang ternakan lembu, kambing dan ayam.

Ops Lagong diketuai Ketua Operasi, Mohd Shahril Abd Ras-

hid dilakukan di kawasan hutan simpan yang dikesan diceroboh seluas kira-kira 14 hektar daripada keseluruhan Hutan Simpan Bukit Lagong yang berkeluasan 3,624.10 hektar.

Timbalan Pengarah Operasi Hutan JPNS, Norddin Noor, berkata pelbagai notis sudah diberikan secara berkala sejak lima tahun lalu meminta penceroboh menghentikan aktiviti mereka di hutan simpan terbabit.

"Kawasan ini didapati diteroka secara haram, sesetengahnya dianggarkan dilakukan sejak 20 tahun lalu, berdasarkan usia pokok yang ditanam dan terbaru dikesan berlaku pada tahun ini dan tahun lalu.

"Aktiviti mereka (penceroboh) adalah menebang pokok hutan untuk mendirikan kebun, menanam pokok durian dan tanaman kontan," katanya pada sidang media di lokasi, semalam.

Norddin berkata, sebanyak 23 struktur binaan akan dirobohkan dengan 13 dirobohkan semalam dan selebihnya akan disambung hari ini.

"Kita percaya terdapat 50 hingga 60 individu terbabit dalam aktiviti pencerobohan di hutan simpan ini, namun buat masa ini kita



Ops Lagong merobohkan struktur binaan haram di Hutan Simpan Bukit Lagong Gombak, semalam. (Foto BERNAMA)

masih mengesan pihak yang bertanggungjawab.

"Kita minta mereka berhenti daripada terus menceroboh kerana kesalahan hutan mengikut Enakmen (Pemakaian) Akta Hutan 1985 di bawah Seksyen 32 dan Seksyen 81.

"Sekiranya didapati bersalah, mereka boleh dikenakan denda tidak kurang daripada RM100,000 atau penjara tidak kurang daripada enam bulan," katanya.

Mengulas lanjut, Norddin berkata, anggaran pencerobohan dianggarkan berlaku sejak 20 ta-

hun lalu berdasarkan saiz pokok yang ditanam seperti pokok durian di kawasan yang diteroka.

"Pada peringkat awal (pewartaan hutan simpan), timbul masalah daripada segi persempadanan kerana ia masih tidak jelas.

"Bagaimanapun, persempadanan sudah dikenal pasti dan ada kebun dan dusun yang diteroka itu didapati masuk di dalam kawasan hutan simpan, justeru tindakan perlu diambil.

"Kita juga mahu memastikan tiada sebarang penempatan didirikan di kawasan hutan kerana tidak mahu ia menjadi seperti

kawasan setinggan," katanya.

Tambahnya, pihak ada menerima lebih 100 permohonan daripada orang ramai untuk melakukan penerokaan namun aktiviti sedemikian adalah dilarang dan tiada sebarang kebenaran diberi.

Ops Lagong yang dijalankan secara bersepadu bersama Ibu Pejabat Polis Daerah (IPD) Gombak, Majlis Perbandaran Selangor (MPS), Pejabat Daerah dan Tanah Gombak dan Tenaga Nasional Berhad (TNB) Gombak dengan kekuatan 75 pegawai dan anggota.